

Grad Novi Pazar

Skupština grada

Odbornička grupa SDA Sandžaka

Novi Pazar

03. septembar 2023. godine

P R E D S J E D N I K U

SKUPŠTINE GRADA NOVOG PAZARA

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O DODJELI UDŽBENIKA I UDŽBENIČKIH KOMPLETA ZA UČENIKE JAVNIH OSNOVNIH I SREDNJIH ŠKOLA NA TERITORIJI GRADA NOVOG PAZARA ZA ŠKOLSKU 2024/2025. GODINU**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red i donese na sjednici Skupštine grada koja će se održati 04. septembra 2023. godine.

Predsjednik odborničke grupe

mr. Ahmedin Škrijelj

PRIJEDLOG

Na osnovu člana 20. stav 1. tačka 4) i člana 32. stav 1. tačka 6) Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 190. Zakona o osnovana sistema obrazovanja i vaspitanja („Službeni glasnik RS“, broj 88/2017, 27/2018 – dr. zakon, 10/2019, 6/2020 i 129/2021), člana 111. Zakona o socijalnoj zaštiti („Službeni glasnik RS“, broj 24/2011 i 117/2022 - odluka US), člana 15. stav 1. tačka 12), člana 46. stav 1. tačka 7) Statuta grada Novog Pazara („Službeni list grada Novog Pazara“, broj 6/19) i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada Novog Pazara na sjednici održanoj 04. septembra 2023. godine, donosi

ODLUKU

o dodjeli udžbenika i udžbeničkih kompleta za učenike javnih osnovnih i srednjih škola na teritoriji Grada Novog Pazara za školsku 2024/2025. godinu

Član 1.

Ovom odlukom utvrđuje se pravo na dodjelu udžbenika i udžbeničkih kompleta za učenike javnih osnovnih i srednjih škola na teritoriji grada Novog Pazara.

Pravo na dodjelu udžbenika i udžbeničkih kompleta ostvaruju učenici javnih osnovnih i srednjih škola na teritoriji grada Novog Pazara.

Za potrebe realizacije ove odluke Grad Novi Pazar može osnovati i Fond za besplatne udžbenike, kao posebno pravno lice.

Član 2.

Sredstva za finansiranje udžbenika i udžbeničkih kompleta iz člana 1. ove odluke obezbjeđuju se u budžetu Grada Novog Pazara.

Član 3.

Odjeljenje za društvene djelatnosti, Gradske uprave za izvorne i povjerene poslove, staraće se o realizaciji ove odluke i obezbeđivanju udžbenika i udžbeničkih kompleta za školsku 2024/2025. godinu.

Član 4.

Ovu odluku objaviti u “Službenom listu grada Novog Pazara.”

SKUPŠTINA GRADA NOVOG PAZARA

Broj:

U Novom Pazaru, 04. septembra 2023. godine

PREDSJEDNIK

Dr. Anela Šemsović

O B R A Z L O Ž E N J E:

Pravni osnov za donošenje odluke:

Pravni osnov za donošenje ove odluke sadržan je u:

- članu 20. stav 1. tačka 4) i članu 32. stav 1. tačka 6) Zakona o lokalnoj samoupravi;
- članu 190. Zakona o osnovana sistema obrazovanja i vaspitanja
- članu 111. Zakona o socijalnoj zaštiti
- članu 15. stav 1. tačka 1) i članu 46. stav 1. tačka 7) Statuta grada Novog Pazara;
- članu 137. Poslovnika Skupštine grada Novog Pazara.

Razlozi za donošenje odluke:

Razlog za donošenje ove odluke utemeljen je u obavezi lokalne samouprave da adekvatno brine o ostvarivanju prava djece na obrazovanje i jednakoj dostupnosti obrazovanja svoj djeci. Dodjela besplatnih udžbenika za učenike osnovnih i srednjih škola predstavlja obavezu svakoj odgovornoj, humanoj i dobronamjernoj vlasti. U vrijeme kada je sve više djece onemogućeno da ima nove udžbenike ili da ih uopšte ima, zbog finansijske situacije u kojoj se nalaze njihovi roditelji, lokalna samouprava odnosno gradska vlast mora pokazati brigu o svojim građanima i biti im maksimalna podrška u prevazilaženju postojeće ekonomske situacije u kojoj se narod u Novom Pazaru nalazi. Enormno velika stopa nezaposlenosti i sve veće siromaštvo u Novom Pazaru rezultat je i 15-to godišnje politike koja upravlja ovim narodom manje iz Novog Pazara a više iz Beograda. Donošenje odluke o dodjeli besplatnih udžbenika za narednu školsku godinu predstavlja najmanju moguću pomoć koju je vlast dužna da obezbijedi.

Vlast u Novom Pazaru, djeci ovog grada duguje besplatne udžbenike i dužna im je to pružiti. Ne postoji nijedno opravdanje koje može amnestirati vladajuću većinu da ne prihvati ovu odluku.

Ovom odlukom predloženo je da se u svrhu realizacije ove odluke može osnovati i Fond za besplatne udžbenike kako bi se stvorila mogućnost da se i naši uspješni privrednici i sportisti i drugi uspješni pojedinci iz Novog Pazara, Sandžaka i dijaspore mogu uključiti i svojim donacijama doprinijeti realizaciji ovog projekta od izuzetne važnosti.

Donošenje ove odluke važno je i sa aspekta redukcije nepotrebnih troškova koje vlast pravi a finansira ih novcem građana. Ovom odlukom novac građana se vraća samim građanima na najbolji mogući način.

Neophodnost donošenje ove odluke ogleda se i u potrebi da se institucije vlasti i sistem na kome počivaju konačno počnu usklađivati sa realnim potrebama građana.

Ova Odluka predstavlja strateško usmjerenje Grada Novog Pazara da u naredom periodu putem ove ali i drugih mjera koje će se preduzimati i sprovesti, na principima socijalno odgovorne politike, budžet usmjeri ka djeci i učenicima i stavi ih u fokus svog interesovanja.

Objašnjenje pojedinačnih rješenja propisanih ovom odlukom:

Član 1: Utvrđen je predmet odluke, odnosno pravo učenika osnovnih i srednjih škola na teritoriji Grada Novog Pazara na dodjelu udžbenika i udžbeničkih kompleta

Član 2: Propisana je obaveza da se nabavka udžbenika i udžbeničkih kompleta finansira iz budžeta grada Novog Pazara.

Član 3: Određen je organ zadužen za realizaciju ove odluke.

Član 4: Propisana je obaveza objavljivanja u „Službenom listu grada Novog Pazara“.

Finansijska sredstva za sprovođenje ove odluke obezbijediće se u budžetu grada.